



Sud Bosne i Hercegovine
Sud Bosne i Hecegovine

Broj: S1 3 Iž 043671 22 Iž
Sarajevo, 16.08.2022. godine

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić-Čovrk kao predsjednika vijeća, Vesne Trifunović i Zvezdane Antonović kao članova vijeća, odlučujući o žalbi Lamije Džidić sa boravkom u ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine, u nejavnoj sjednici, održanoj dana 16.08.2022.godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što potpis žaliteljice na prijavnom obrascu nije identičan potpisu na identifikacionom dokumentu dostavljenom uz prijavu.

Žaliteljica je protiv navedene odluke blagovremeno izjavila žalbu navodeći da je njena prijava za registraciju odbijena, te moli da se uvaži žalba i da se uvrsti za glasanje putem pošte.

Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.

Žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave žaliteljice za glasanje izvan BiH dostavljene dana 18.07.2022. godine elektronskim putem u skladu sa Upustvom o postupku slanja, prijema, obrade, arhiviranja i zaštite elektronskih prijava državljanina Bosne i Hercegovine za glasanje izvan BiH elektronskim putem („Sl. glasnik BiH“, broj 27/22), utvrdila da potpis žaliteljice na prijavnom obrascu nije identičan potpisu na identifikacionom dokumentu koji je priložen uz prijavu.

Odredba člana 3.15 stav (1) Izbornog zakona BiH propisuje da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Takođe, nakon obrade prijave žaliteljica je putem e-maila obaviještena dana 24.07.2022. godine da njena prijava za glasanje izvan BiH sadrži nedostatke. Navedene nedostatke žaliteljica nije otklonila u ostavljenom roku od dva dana, a koji rok je prekluzivan i ne može se produžavati. Stoga je pravilna odluka Centralne izborne komisije BiH da ne dozvoli upis u Izvod iz Centralnog biračkog spiska žaliteljici.

Napomene radi, žaliteljici nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**Predsjednik Vijeća
Sudija**

Dinka Bešlagić-Čovrk